

Augustus
2011Posbus 20
Hermanus 7200

	Telefoon	Faks
Hermanus	028 313 8000	028 312 1894
Gansbaai	028 384 8300	028 384 0241
Kleinmond	028 271 8400	028 271 4100
Stanford	028 341 8500	028 341 0445
24 Uur Beheerkamer Brandweer	028 313 8000/8111 028 312 2400	

Bulletin

Amptelike nuusbrieff van Munisipaliteit Overstrand

• OVERSTRAND BLINK UIT MET WATERGEHALTEBESTUUR

PLEK ONDER TOPTIEN MET GROENDRUPPEL

Munisipaliteit Overstrand het op Donderdag 30 Junie 2011 vyf toekennings by die jaarlikse konferensie oor Drinkwatergehalte in Kaapstad ontvang.

Die watersuiweringsaanlegte in Gansbaai (Franskraal) en by Buffelsrivier naby Pringlebaai asook Stanford se waterskema het die Blouddruppel ontvang wat toegeken word aan aanlegte wat 95 persent of meer in die Departement van Waterwese se nasionale evaluering ontvang.

Hermanus se afvalwaterbehandelingsaanleg het die Groendruppel ontvang wat toegeken word aan afvalwaterbehandelingsaanlegte wat meer as 90 persent in die nasionale evaluering behaal.

Munisipaliteit Overstrand het die algehele negende plek in die landwye Groendruppel-evaluering behaal.

Stephen Müller, Direkteur Infrastruktuur en Beplanning, sê dit is 'n groot prestasie, veral die toptien-posisie wat ten opsigte van die behandeling van afvalwater aan die munisipaliteit toegeken is.

In die Blouddruppelverslag het Munisipaliteit Overstrand 'n gemiddeld van 90,5% vir sy agt waterskemas behaal, vergeleke met die vorige jare se 66% (2010) en 42,5% (2009). 'n Telling van 95% word benodig om Blouddruppelstatus te behaal.

Die telling vir elk van die aanlegte was as volg: Groter Hermanus 87,23% (op vanaf 75,31%), Buffelsrivier 95,07% (op vanaf 63,83%), Kleinmond 93,09% (op vanaf 60,08%), Stanford 95,15%, Groter Gansbaai 95,1% (op vanaf 63,81%), Buffeljagsbaai 75,37%, Baardskeedersbos 93,68% en Pearly Beach 94,31%.

Die Blouddruppeltelling dui nie net op watergehalte



By die oorhandiging van 'n trofee vir die negende plek nasionaal in 2011 se Groendruppel-evaluering was, van links, mnr Anderson Mancotywa, president van die Waterinstituut van Suid-Afrika, Hanré Blygnaut, Munisipaliteit Overstrand se adjunk-direkteur vir ingenieursdienste, me Edna Molewa, Minister van Waterwese, en Patrick Robinson, Munisipaliteit Overstrand se eerste tegnikus: ingenieursbeplanning.

nie maar is 'n geweegde totale evaluering van 10 verskillende kriteria, met 26 subkriteria. Die kriteria sluit, onder andere, in doeltreffendheid in risiko-bestuur, prosesbeheer, monitoringsprogramme, gehaltenakoming, datavoorgelegging aan DWW, bekendmaking van resultate en batebestuur.

Die gemiddelde prestasie wat by Munisipaliteit

Overstrand se vyf afvalwaterbehandelingsaanlegte (AWBA's) behaal is ten opsigte van die gehaltebestuur van afvalwater was 88,8%. 'n Telling van 95% word vir die toekenning van Groendruppelstatus verlang.

Die individuele tellings vir die afvalwaterbehandelingsstelsels in Munisipaliteit Overstrand was 92,1% vir Hermanus (op vanaf 66%), 87,9% vir Hawston (op vanaf 57%), 83% vir Stanford (op vanaf 61%), 75,8% vir Gansbaai (op vanaf 66%) en 82,5% vir Kleinmond (op vanaf 66%).

Die Groendruppelstatus dui nie net op die gehalte van afvalwater nie maar is 'n geweegde totale evaluering van sewe verskillende kriteria, met 20 subkriteria, waaronder prosesbeheer, monitoringsprogramme, gehaltenakoming, datavoorgelegging aan DWW, bekendmaking van resultate en medium- tot langtermyn-beplanning.

Mnr Müller het gesê die munisipaliteit het uitstekende vordering getoon met sy doelwit om algehele Blou- en Groendruppelstatus te bekom. Hy het die span gelukkig gewens wat die voorbereidings vir die evaluering gekoördineer het, naamlik mnr Hanré Blygnaut, adjunk-direkteur: ingenieursdienste, en mnr Patrick Robinson (eerste tegnikus: ingenieursbeplanning), asook die Direkoraat Gemeenskapsdienste wat verantwoordelik is vir die bedryf van die aanlegte in die verskillende areas.

DIEP SPORE GELAAT

HULDEBLIK DEUR RDL NICOLETTE BOTHA-GUTHRIE, UITVOERENDE BURGEMEESTER VAN MUNISIPALITEIT OVERSTRAND

Die dood van Theo Beyleveldt, parlamentslid en voormalige burgemeester, op Sondag 3 Julie het Overstrand van een van sy sterkste en talentvolste gemeenskapsleiers ontnem. Mense van sy kaliber is skaars. Sy ywer en passie vir politiek sal deerlik gemis word.

Hy was daarvoor bekend dat hy altyd sy gemeenskap vooropgestel het, dalk selfs tot nadeel van sy eie gesondheid. Hy het sy gemeenskap met integriteit gedien, en vir my was dit 'n wonderlike voorreg om 'n goedgeorganiseerde en welvarende munisipaliteit by hom oor te neem.

Theo was die tipe mens wat 'n sukses gemaak het van alles wat hy gedoen het: as 'n sportman, soldaat en politikus. Hy was iemand wat daarin ge-

glo het om daadwerklik op te tree, wat dan ook die rede is waarom hy by die politiek betrokke geraak het. Om 'n verskil van binne te maak, is beter as om van buite te kla, het hy geglo.

Theo was bekend vir sy deernis vir kinders, bejaardes en behoeftiges. As 'n burgemeesterspaar het hy en sy vrou, Marianné, daarna gestreef om in die behoeftes van minder-bevoorregtes te voorsien.

Die beste manier om eer aan hierdie groot man te betoon, sal wees om sy skoene na die beste van my vermoë vol te staan.



KLIPPIES IN DIE SKOEN

Misverstande of foutiewe inligting lei dikwels tot onnodige probleme met munisipale dienslewering. Overstrand Bulletin hoop om met die volgende lysie wenke u skakeling met die munisipaliteit in die toekoms veel aangenamer te maak.

- Kliënte moet seker maak dat die korrekte adres verskaf word wanneer dienste versoek word.
- Wanneer 'n kliënt 'n lekkasie by sy watermeter aanmeld, moet hy seker maak waar die lekkasie is. As dit aan die eienaar se kant van die watermeter is, word hy vir die uitroepkoste verantwoordelik gehou. Hou ook in gedagte dat daar 'n verskil in uitroepkoste tussen kantoorure en na-ure is.
- Wanneer 'n kliënt versoek dat sy riooltenk uitgepomp moet word, maar die uitsuigpunt is gebreek of nie toeganklik nie, word hy vir die uitroepkoste verantwoordelik gehou.
- Wanneer 'n kliënt versoek dat 'n finale of 'n spesiale water- en elektrisiteitlesing gedoen word, is 'n tarief betaalbaar.
- Indien die watermeter ontoeganklik is en nie geles kan word nie, word daar steeds 'n administrasiekoste gehef.
- Indien die kliënt versoek dat 'n watermeter en/of -lesing geverifieer word, is daar ook 'n koste wat teen die kliënt se rekening gehef sal word.
- Indien u een betaling vir verskillende rekeninge doen, moet u spesifiseer hoeveel op elk van die rekeninge betaal moet word. Daar kan maklik in so 'n situasie 'n agterstallige bedrag op een van die rekeninge ontstaan wat tot rente, invorderingskoste en verhoging van deposito's aanleiding kan gee.
- Verkeerde verwysings op internetbetalings en direkte bankdeposito's veroorsaak dat die geld nie toegewys kan word nie. Rente, invorderingskoste en verhoging van deposito's kan volg.
- Indien 'n kliënt 'n rekening laat of glad nie ontvang nie, moet navraag by die kantoor gedoen word want die rekening se betaaldatum bly die 20ste van 'n maand.

DIE WÊRELD REIK SY HAND IN VRIENDSKAP UIT

Voortspruitend uit 'n onlangse verwelkomingsgeleentheid vir die Rotariërs se jaarlikse distrikskonferensie, wat vanjaar in Hermanus gehou is, is Burgemeester Nicolette Botha-Guthrie genooi om as 'n ere lid by die Rotariërklub aan te sluit. Beïndruk deur die beginsels, verantwoordelikhede en verpligtinge van die oudste diensorganisasie in die wêreld, het die Burgemeester dit as 'n eer en 'n voorreg aanvaar en is op 23 Junie 2011 ingelyf. Hier ontvang sy haar kentekens en die hand van vriendskap en kameraadskap van regter Deon van Zyl, aangewese distriksgoewerneur, wat haar simbolies met die meer as 1,2 miljoen lede verbind wat wêreldwyd aan nagenoeg 34 000 klubs behoort.



BO: Die verdedigende kampioene Salim United saam met burgemeester Nicolette Botha-Guthrie, Bulelwa Mbane (sport en ontspanning) en mnr Morris Tshabala.
REGS: Die Siyadlala Ladies spog met hul trofee.

SALIM UNITED BEHOU TITEL

Verdedigende kampioene Salim United het weer eens op Saterdag 18 Junie by die Zwelihle-sportgronde in Overstrand se toernooi om die Burgemeestersokkerbeker geseëvier.

In byna perfekte sokkertoestande is dié span van Mount Pleasant eers aan 'n strafskopstryd onderwerp voordat hulle daarin kon slaag om die oorhand oor hulle bure, die Sweepers van Zwelihle, te kry. Zama-Zama van Gansbaai het derde geëindig.

Sokkergeesdriftiges het gesê dit was een van die opwindendste eindstryde wat hulle tot nog toe in ons area gesien het.

Op die laaste dag van vanjaar se Burgemeestersokkertoernooi het vier mans- en vier damespanne mekaar die stryd aangesê om met die louere as Overstrand se kampioene te kan wegstap. Die sportgronde was stampvol ondersteuners van oral in die munisipale gebied.



Burgemeester Nicolette Botha-Guthrie het die spanne voor die aanvang van die wedstryd met 'n paar woorde bemoedig: "Ek wil graag al die spanne wat aan hierdie toernooi deelgeneem het, daarmee gelukwens dat hulle tot die finale stadium deurgedring het en tegelyk die plaaslike organiseringskomitee vir 'n puik stukkie werk bedank!"

Sy het ook gemeld dat die munisipaliteit sport as 'n manier beskou om mense bymekaar te bring en te verenig. Die onlangse burgemeester-rugbytoernooi was ook 'n groot sukses, en die munisipaliteit dink nou daaraan om 'n kriekettoernooi van stapel te stuur, het Burgemeester Botha-Guthrie gesê.

In die dameskompetisie het Siyadlala Ladies van Zwelihle gewen deur Mighty Ladies 3 – 0 te verslaan. Real Pioneers van Gansbaai het derde geëindig.



JONG STERRE BETREE VERHOOG

Op Donderdag, 11 Augustus om 19:00 gaan die beroemde fluitspeler Dawid Venter, begelei deur "een van die grootste pianiste van sy tyd", Ben Schoeman, in Overstrand se Burgersentrum optree. Dawid het verskeie prestisie-toekennings en -studiebeurse, beide in Suid-Afrika en in Frankryk, verower. Schoeman, wat al voorheen in Hermanus se Ouditorium opgetree het, is Standard Bank se Jong Kunstenaar vir musiek. Die twee gaan werke deur Bach, Francis Poulenc, Francois Borne, Henri Dutilleux, Pierre Sancan en Charles-Marie Widor speel. Kaartjies kos R80 (R40 vir skoliere), en besprekings kan by BELLINI by 028 312 4988 gedoen word. Skakel René du Plooy by 082 940 4238 vir enige ander navrae.



0800 701 701

Hoe om te registreer vir die Munisipaliteit se SMS-diens

SMS u rekeningnommer met die letters SMS aan 082 338 1631 of kontak 'n Kliëntediensbeampte by u naaste Betaalsaal.

